

DAKOTA TAWAXITKU KIN

St. Paul, Minn., Dec. 1850.

Xa Iapi ota kin he Tokiyatanhan Hwo!

"Wicaxta hiyeeye cin iapi toktokeca ota kin, he tokeca ce on hececa hwo," wicaxta ota ecinpi nace. "Wakantanka toka wicaxta icarwicayee cehan, okar toktokeca, iapi toktokeca ko, ota ehan kega nace." wicaxta apa ecinpi nace. Tuka iye Wakantanka hecen unkokiayakapi xni. Iye tokaheya wicaxta wanjidat icarya, unkan, he etanhan oyate iyorpa iwicacaga. Toka gehan, wicaxta wanjidat icaga, naka iapi kin ix eya wanjidat tuka. Toka wicaxta icage cin, hetanhan wanijetu kektopawinge wanjidat sanpa opawinge xakpe hehanhan, iapi wanjidat unpi, qa tuwedan xa ie xni keyapi.

Unkan, hehan wanna oyate ota, tuka oran wicaxtapi xni, qa tuwe icarwicaya hecinhan, he ohodapi xni, on etanhan minitan, qa iyorpa ihangwicayapi. Wicowazi wanjidat okaptapi. Hehan akex, wicowazi kin he etanhan wicacaga uye, tuka wicowazi wanjidat nakax, ake iapi wanjidat unpi.

Tuwedan rin xa ie xni keyapi. Unkan, hetanhan wanna ake wanijetu ota, qa wicaxta ota wanna ake he agupi, tuka "maka owancaya iapi wanjidat oyate owasin unpi."

Wicaxta owasin owancaya eante yuzapi, unkan, hecen waxte rince se ececa kta tuka.

Tuka waxtepi xni keyapi. Taku waxte cinpi xni; xica e en owasin akaptapi, qa wannacaidapi qa taku wakan wanjidat iyotat kin, he ohodapi xni keyapi. Unkan makomdaye wan tankaya en owasin witya etipi. Iye Wakantanka, maka oise topa kin, hetakia eka itoheya enanakiya e un wicaxta, tuka iye kin omdecahanpi kte xni keyapi, qa makomdaye qon en otowe wan tanka rin kagapi, qa okuwanjidan waxagya yakonpi kta kecinpi. Iho, hecen Wakantanka tawakunze opapi xni; tuka iye tawakunze kin, he e okipe wacinpi, qa owasin iapi wanjidat ke iapi kin, on waxaka hidapi. Tuka okiputipi. Hen hecen xkampi icinhan Wakantanka okiirin iapi nakiciron xni wicaya, unkan, owasin xa iapi, qa toketu tanin xni hida keyapi. Wannacaidapi qon, hehan hinakaha takudan okihipi xni, qa otowe wan tanka kagapi kte eiqon, he ayuxtanpi. Witya unpi kta keyapi qon, hehan hinakaha owasin erpekiciyapi, qa enanakiya omdecahanpi, qa onxixiya maka amaj yakonpi, qa wokakije ko ota sdocapi. Iye Wakantanka wayukakija waxte daka on hecen xni; tuka wicaxta kin ohiniyan sanpa rin oihduxicapi kin, he naptaca cin, on hecen.

Iapi kin on waxaka hidapi, tuka Wakantanka hecen, unkan, iapi nakicironpi xni kin, on iyotatnan iyekiyapi, qa teriya unpi. Iho hena hecetu.

Hena on etanhan dehan nakaha, oyate toktokeca opawinge ota, tuka owasin iapi toktokeca unpi kin, on taku xica ota akipapi. Wokiyee aiapi kex, toketu tanin xni ece. Tuwe ieska kiyapi kin, he iapi wanji yaxna ca, hetanhan taku owasin xkixka hida ece, qa on oyate canniye kiciyapi, qa nina akicila yakonpi. Na iapi kin on, toka kiciyapi, qa onxixya kicicuwapi, qa kakixkicije wacinpi. Dehan maka akan iapi toktokeca kektopawinge ota keyapi. Henakeca tuka, tona oyate ianakiironapi xni, qa wowapi codan unpi kin, hena owasin om kicicipajinpi, qa om xixicaya eante kicicixuzapi.

Wowapi kin he wayuwaxte un, qa oyate

wica yuokunwanjidat aye ca taku waxte kin, ektakiya yutitan awicau se ececa. Iho, hena on Waxicun kin, wowapi kin wokitan-yampi. Ecin waxte qa yaxinpicia xni. Tuka Wowapi Wakan kin he iyotat. He wicacante oze yuwaxte, qa tona awacin yakonpi, qa ecen ecan wacinpi kin, hena owihan-ke xni tanyan unpi kte.

[a] Ikeewicaxta oiwapi kta eca, apa waxixkixke wacinpi se ececa. Tuwe Waxicun tohini owicawa xni, ehanhan, tokeca-pi wicayukean xni. Dakota owicawapi kin, terike eeyax, Ikeewicaxta atokan kin anap-tecapi xni.

Cokan, Hotanke owicawapi kta, unkan, conkaxke ohna wicahmakapi, qa tiyopa wan-jidan eonpi. Unkan, Waxicun tiyopa kin en najin, qa wanjikidan hdicupi aya ca, owicawa keyapi. Hececa tka nakun Waxicun wicahmayanpi keyapi. Wanjikixi hdi-cupi eca, ake reyata tanhan iyorpe iciyapi, qa ake hdicupi ece keyapi.

Waxicun ohonni awanyag najinpi, hehan kitan ser, owicakihipi keyapi.

Ikeewicaxta hecen xkampi eca Waxicun kin iwarte wicadapi xni ece. Apa wicaxta kin, "Minixanna ota mdula ke," ecinpi on hecen xkampi. Tuwe ota yuze cinhan, tokan kin ix, hecen iyotpani wicayapi kin, he awacipi xni.

Hotanke Oranpi.

Mdokehan, empaxa-wi kin, he en. Rara wakpa ohna, maka sapa oze kin hen, Hotanke qeya, itohoninpi, unkan, ehake onge dapi. Tuka Waxicun wicadapi xni nace. Hececa ihom eca, iyecinka icupi kta keyapi, qa Waxicun kin talpe wicayapi, qa wanji isto kawegapi, qa taku wanjikixi mazopiye kin etanhan icupi keyapi.

Iho hecen, Hotanke kin hetanhan, xako-win, Mdoto kin den, kaxka wicahnakapi. Waxicun wanji, nakun opa keyapi, qa he nakun opeya kaxkapi. Hececa hetanhan, wi topa eca, hehanhan rtaai wicakiyapi.

Hotanke wan Hinakapi.

Hotanke wan Heraka tanka eciyapi kin, he tohini, iyoxipi xni, tuka okar tori ya nace. Tanihan Peta Wata ohna Hotanke wicemna napeywanke okaga tanhan awicahdipi, unkan, Heraka tanka en opa keyapi. Imijja skadan en, ren ihampi, qehan, he kaxkapi. Tipahen tona can kaxxa yanke, tuka hehan kiyuxkapi, qa tuwe Waxicun wan, suxtanka wah qu, qa akan yotang tatowan kihda keyapi.

Wicaxtayatapi Tanean kin, Iyog rinakapi.

Isantanka Wicaxtayatapi yuhapi, mdokehan te eiqon, he, he ehan, Washington [Washington] otowe hen hnakapi. Axtatadan sonkaku wan qa iye takoxku kici, tanean kin ahdiyakapi, qa Minixoxe mdote iyokaga tanhan, wakpa wan akotkiya, iyeye cin, Ohio wakpa eciyapi kin, he ohna irara kin en, otowe wan, Louisville eciyapi kin, hen ahdi hinakapi keyapi.

Wo Wicakahipi.

Mdokehan Mdewakantonwan maga tawapi apa aminitan, unkan, wanijetu kinhan terike kta seca; tuka ateyapi kin, taku iwicakihihida, qa kukuxe, aguyapi, wahinske ko, mazaska-kektopawinge zaptan [\$5,000] iyopewicakiciciyapi, qa wanna wicakahipi. Hececa tanyan inapapi kte. Pidapi kta nace.

Wiyorpeyata Ekta Wicoran Wanji.

Wiyorpeyata ekta makoce wan Oregon eciyapi. Hen Ikeewicaxta oyate ota yakonpi. Dakota hececa. Unkan Waxicun wakan wanjikixi ekta ipi, waonspewicakiyapi. Waxicun wakan wanji pejihuta wicaxta heca. Wayazankapi eca, he pejihuta wicaxta ece, tuka keyapi. Unkan, omaka 1847, en makoxice ececa, qa ota on tati: unkan, tuwe waxicun hewicakiya nace. "Waxicun wakan tapejihuta on nitapi ee," eya nace. Unkan Ikeewicaxta kin, xicaya eante yuzapi, qa Waxicun wakan ota wicaktepi, qa winorinea, xiceca ko, hena niyake awicahdipi keyapi. Heconpi unkan, Isantanka wicakizapi, qa apa wicaktepi, qa wayaka wicayuzapi qon, hena wicahdohdipi. Hehan ake iyohakam, Waxicun wicaktepi en opapi qon, hetanhan napeywanke wicakaxkapi, qa Waxicun nom opapi keyapi, qa hena om wicakaxkapi keyapi. Wohdag wicakiyapi, unkan, pawicayuksapi kta keyapi ee, eyapi. Mdokehan hecen oyakapi.

Makoce Iwanyag Ihipi.

Mleyata Ikeewicaxta oyate wan, Stoek-bridge wicaxta ewicakiyapi. Hanke wanna wowapi onspepi, qa Waxicun ehduzapi. Waxicun wicoran yuhapi kin, ix iyecen oranyanpi. Tipi waxte icicayapi, maga ko waxte kagapi, qa wanuyampi ocaje oto etanhanhan yuhapi, qa Wakantanka eciyapi kin opapi. Hena makoce en yukanpi kin, Isantanka wicakidapi, on etanhan, tanihan hetanhan wicaxta indawa nom, deciya, wakpa Minnesota ohna makoce iwanyag hipi. He wicaxta nonpapi kin, uman John, Quinby eciyapi, qa uman kin ix Ziba H. Peters eciyapi keyapi. Wiyaka otidan hehan ipi, qa hetanhan hdicupi keyapi.

Mazaska Wicakahipi Xni.

Minnesota makoce kin en Ikeewicaxta yakonpi kin, tona mazaska wicakicupi ece kin, nakaha wicakahipi xni. Minixoxe mdote (St. Louis) kin en. Isantanka wan Itanean kiyapi kin, he mazaska qupi eca, ix kosanta deciya uya ece, tuka tuwedan on wowapi yutan xni kin, on etanhan mazaska kin qupi xni keyapi. Iho hecen etanhan taku ahipi xni. Car akan aupi kta exta tawa/en yapi kte xni. Maksanpe kinhan okini ahipi kta nace. Ahipi exta nakun wanhdakapi kte xni, ecin owasin tanihan wanna aicazopi keyapi Waxicun kin iyex okini icakijapi kta nace.

Wicaxta wan Wakantanka Wanyaka cin, Oyakapi.

Wicaxta nonpa, uman wicaxtayatapi, tuka Wakantanka eciyapi ope xni, qa uman kin ix, wicaxta indawa rinea, tuka Wakantanka eciyapi opa keyapi. Tukan uman wicaxtayatapi qon, heya nace. "Wakantanka nitawapi kin he, eca owancaya un, qa nitawa kin, en opeya un kelapi kin, ito wanyako wacani ee, eya." Unkan uman kin heya; "Wakantanka, eca owancaya un, keyapi kin, he hecetu, tuka wiyatpa rince cin, on etanhan, wicaxta on wanyag picia xni ee, eya. "Hececa xta wanyag makiya wo, eya" keyapi. Unkan uman kin, hehan heya; "Wakantanka wandake kte rinea, tuka taku kaye cin, he wanji, ito tokaheya wanyag uta wo eca," eye, echan. "Iho," eya keyapi. Unkan tankan injinpi. Wannawiyotatnan unkan, heciya, "Wakan itoheya etanwe ca wi kin oparta najin wo," eya. Wi kin owotama yanke nakax maxte rinea. Wicaxtayatapi kin, ekta etonwan tuka, okitponi eor heya, "Hehehe! owakihit xni, ixtomaxije do," eya keyapi. Uman hehan ake heya. "Taku kage cin he e kax, wandake kta oyakitpani; token ecin iye rit e eex wandaka oyakihit kta." Iyex iyotan wiyatpa rinea, eya keyapi.

Hokxidan ksapi eca, wowapi onspe iciciyoye wacin ece keyapi.